


大智度論

第三十一

二百十一
名一

48467



松平國書藏

大智度論卷第三十一

龍樹菩薩造

姚秦三藏法師鳩摩羅什譯

名

釋初品中十八空第三十九

復次舍利弗菩薩摩訶薩欲住內空外空內
外空空空大空第一義空有為空無為空畢
竟空無始空散空性空自相空諸法空不可
得空無法空有法空無法有法空當與般若
波羅蜜內空者內法內法空內法者所謂內
六入眼耳鼻舌身意眼空無我所無眼
法耳鼻舌身意亦如是外空者外法外法空
外法者所謂外六入色聲香味觸法色空者
無我無我所無色法聲香味觸法亦如是內

外空者內外法內外法空內外法者所謂內
外十二入十二入中無我無我所無內外法問
曰諸法無量空隨法則亦無量何以但說十
八若略說應一空所謂一切法空若廣說隨
一一法空所謂眼空色空等甚多何以但說
十八空荅曰若略說則事不周若廣說則事
繁譬如服藥少則病不除多則增其患應病
投藥令不增減則能愈病空亦如是若佛但
說一空則不能破種種邪見及諸煩惱若隨
種種邪見說空空則過多愴在斷滅說十八
空正得其中復次若說十若說十五俱亦有
疑此非問也復次善惡之法皆有定數若四

念處四正勤三十七品十力四無所畏四無礙智十八不共法五衆十二入十八界十二因緣三毒三結四流五蓋等諸法如是各有定數以十八種法中破著故說有十八空問曰般若波羅蜜空十八空為異為一若異者離十八空以何為般若空又如佛說何等是

般若波羅蜜所謂色空受想行識空乃至一切種智空若不異者云何言欲住十八空當學般若波羅蜜答曰有因緣故言異有因緣故言一異者般若波羅蜜名諸法實相滅一切觀法十八空則十八種觀今諸法空菩薩學是諸法實相能生十八種空一者十八空

是空無所有相般若波羅蜜亦空無所有相
十八空是捨離相般若波羅蜜一切法中亦
捨離相是十八空不著相般若波羅蜜亦不
著相以是故學般若波羅蜜則是十八空不
異故般若波羅蜜有二分有小有大欲得大
者先當學小方便門欲得大智慧當學十八
空住是小智慧方便門能得十八空何等是
方便門所謂般若波羅蜜經讀誦正憶念思
惟如說修行譬如人欲得種種好寶當入大
海若人欲得內空等三昧智慧寶當入般若
波羅蜜大海問曰行者云何學般若波羅蜜
時住內空外空內外空荅曰世間有四顛倒

不淨中有淨顛倒苦中有樂顛倒無常中有常顛倒無我中有我顛倒行者為破四顛倒故修四念處十二種觀所謂初觀內身三十六種不淨充滿九孔常流甚可厭患淨不可得淨不可得故名內空行者既知內身不淨觀外所著亦復如是俱實不淨愚夫狂惑為姪欲覆心故謂之為淨觀所著色亦如我身淨不可得是為外空行者若觀己身不淨或謂外色為淨若觀外不淨或謂己身為淨今俱觀內外我身不淨外亦如是外身不淨我亦如是一等無異淨不可得是名內外空行者思惟知內外身俱實不淨而惑者愛著深

故由以受身身為大苦而愚以為樂問曰三
受皆外入所攝云何言觀內受荅曰六塵初
與六情和合生樂是名外樂後貪著深入生
樂是名內樂復次內法緣樂是名內樂外法
緣樂是名外樂復次五識相應樂是名外樂
意識相應樂是名內樂鹿樂名為外樂細樂
名為內樂如是等分別內外樂苦受不苦不
樂受亦如是復次行者思惟觀是內樂實不
可得不即分別知實不可得但為是苦強名為
樂何以故是樂苦因緣生亦生苦果報樂無
厭足故苦復次如人患疥搔雖小樂後轉傷
身則為大苦愚人謂之為樂智者但見其苦

如是世間樂顛倒病故者五欲樂煩惱轉多
以是故行者不見樂但見苦如病如癱如瘡
如刺復次樂少苦多少樂不現故名爲苦如
大河水投一合鹽則失鹽相不名爲鹹復次
樂不定故惑此以爲樂彼以爲苦彼以爲樂
此以爲苦著者爲樂失者爲苦愚以爲樂智
以爲苦見樂患爲苦不見過者爲樂不見樂
無常相爲樂見樂無常相爲苦未離欲人以
爲樂離欲人以爲苦如是等觀樂爲苦觀苦
如箭入身觀不苦不樂無常變異相如是等
觀三種受心則捨離是名觀內受空觀外受
內外受亦如是行者作是念若樂即是苦誰

受是苦念已則知心受然後觀心為實為虛
觀心無常生住滅相苦受心樂受心不苦不
樂受心各各異念覺樂心滅而苦心生苦心
介所時住住已還滅次生不苦不樂心知介
所時不苦不樂心住住已還滅滅已還生樂
心三受無常故心亦無常復次知染心無染

心瞋心無瞋心癡心不癡心散心攝心縛心
解脫心如如是等心各各異相故知心無常無
一定心常住受苦受樂等心從和合因緣生
因緣離散心亦隨滅如是等觀內心外心內
外心無常相問曰心是內入攝去何為外心
答曰觀內身名為內心觀外身名為外心復

次緣內法爲內心緣外法爲外心復次五識
常緣外法不能分別故名爲外心意識能緣
內法亦分別好醜故名爲內心復次意識初
生未能分別決定是爲外心意識轉深能分
別取相是名內心如是等分別內外心行者
心意轉異知身爲不淨相知受爲苦相知心
不住爲無常相結使未斷故或生吾我如是
思惟若心無常誰知是心心爲屬誰誰爲心
主而受苦樂一切諸物誰之所有即分別知
無有別主但於五衆取相故計有人相而生
我心以我心故生我所我心生故有利益
我者生貪欲違逆我者而生瞋恚此結使不

從智生從狂惑生故是名爲癡三毒爲一切
煩惱之根本悉由吾我故作福德爲我後當
得亦修助道法我當得解脫初取相故名爲
想衆因吾我起結使及諸善行是名行衆是
二衆則是法念處於想行衆法中求我不可
得何以故是諸法皆從因緣生悉是作法而
不牢固無實我法行如芭蕉葉葉求之中無
有堅想如遠見野馬無水有水想但誑惑於
眼如是等觀內法外法內外法問曰法是外
入攝云何爲內法荅曰內法名爲內心相應
想衆行衆外法名爲外心相應想衆行衆及
心不相應諸行及無爲法一時等觀名爲內

外法復次內法名爲六情外法名爲六塵復
次身受心及想行衆摠觀爲法念處何以故
行者旣於想衆行衆及無爲法中求我不可
得還於身受心法中求亦不可得如是一切
法中若色若非色若可見若不可見若有對
若無對若有漏若無漏若有爲若無爲若遠
若近若麤若細其中求我皆不可得但五衆
和合故強名爲衆生衆生即是我我不可得
故亦無我所我所不可得故一切諸煩惱皆
爲衰薄復次身念處名一切色法行者觀內
色無常苦空無我觀外色觀內外色亦如是
受心法亦尔四念處內觀相應三昧名內空

四念處外觀相應三昧名外空四念處內外
觀相應三昧名內外空問曰是空爲是三昧
空爲是法空答曰名爲三昧空如經說三三
昧三解脫門空無相無作是空三昧緣身受
心法不得我我所故名爲空問曰四念處空法
皆應觀無常苦空無我何以故身觀不淨受
觀是苦心觀無常法觀無我答曰雖四法皆
觀無常苦空無我而衆生身中多著淨顛倒
受中多著樂顛倒心中多著常顛倒法中多
著我顛倒以是故行者觀身不淨觀受苦觀
心無常觀法無我復次內外空者無有內外定
法互相因得故謂爲內外彼以爲外我以爲內

我以為外彼以為內隨人所繫內法為內隨人所著外法為外如人自舍為內他舍為外行者觀是內外法無定相故空復次是內外法無有自性何以故和合生故是內外法亦不在和合因緣中若因緣中無者餘處亦無內外法因緣亦無因果無故內外法空問曰內外法定有去何言無如手足等和合故有身法生是名內法如梁椽壁等和合故有屋法生是名為外是身法雖有別名亦不異足等所以者何若離足等身不可得故屋亦如是答曰若足不異身者頭應是足足與身不異故若頭是足者甚為可笑問曰若足與身不

異者有如是過今應足等和合故更有法生
名爲身身雖異於足等應當依於足住如衆
縷和合而能生氎是氎依縷而住荅曰是身
法爲足等分中具有爲分有若具有頭中應
有脚何以故身法具有故若分有與足分無
異又身是一法所因者多一不爲多多不爲
一復次若除足等分別有身者與一切世間
皆相違背以是故身不得言即是諸分亦不
得言異於諸分以是故則無身身無故足等
亦無如是等名爲內空房舍等外法亦如是
空名爲外空問曰破身舍等是爲破一破異
破一破異是破外道經佛經中實有內外法

所謂內六情外六塵此云何無荅曰是內外
法和合假有名字亦如身如舍復次略說有
二種空衆生空法空小乘弟子鈍根故爲說
衆生空我我所無故則不著餘法大乘弟子
利根故爲說法空即時知世間如涅槃聲聞
說內空於內法中無我無我所無常無作者
無知者無受者是名內空外空亦如是示說
內法相外法相即是空大乘說內法中無內
法相外法中無外法相如般若波羅蜜中說
色色相空受想行識識相空眼眼相空耳鼻
舌身意意相空色色相空聲香味觸法法相
空如是等一切諸法自法空問曰此二種說

內外空何者是實。答曰：二皆是實，但為小智。鈍根故，先說衆生空，為大智利根者。說法空，如人閉獄，破壞桎梏，傷殺獄卒，隨意得去。又有怖畏盜穿牆壁，亦得勉出，聲聞者，但破吾我，因緣不生，諸煩惱離，諸法愛畏怖老病死，惡道之苦，不復欲本末推求了了，壞破諸法，但以得脫為事。大乘者，破三界獄降伏魔衆，斷諸結使，及滅習氣，了知一切諸法本末，通達無礙，破散諸法，令世間如涅槃，同寂滅相。得阿耨多羅三藐三菩提，將一切衆生，令出三界。問曰：大乘云何破壞諸法？答曰：佛說色從種種因緣生，無有堅實，如水波浪而成泡。

沫暫見即滅色亦如是今世四大先世行業
因緣和合故而得成色因緣滅故色亦俱滅
行無常道轉入空門所以者何諸法生滅無
有住時若無住時則無可取復次有爲相故
生時有滅滅時有生若已生生無所用若未
生生無所生法與生亦不應有異何以故生
若生法應有生生如是復應有生是則無窮
若生生更無生者生亦不應有生若生無有
生者法亦不應有生如是生不可得滅亦如
是以是故諸法空不生不滅是爲實復次諸
法若有終歸於無若後無者初亦應無如人
著屐初已有故微細不覺若初無故則應常

新若後有故相初亦有故法亦如是後有無
故初亦有無以是故一切法應空以衆生顛
倒著內六情故行者破是顛倒名爲內空外
空內外空亦如是空空者以空破內空外空
內外空破是三空故名爲空空復次先以法
空破內外法復以此空破是三空是名空空
復次空三昧觀五衆空得入聖道斷諸煩惱
得有餘涅槃先世業因緣身命盡時欲放捨
八道故生空空三昧是名空空問曰空與空
空有何等異荅空破五受衆空空破空問曰
空若是法空爲已破空若非法空何所破荅
曰空破一切法唯有空在空破一切已空亦

應捨以是故。須是空空復次空。緣一切法空。空但緣空。如一健兒破一切賊。復更有人能破此健人。空空亦如是。又如服藥。藥能破病。病已得破。藥亦應出。若藥不出。則復是病。以空滅諸煩惱病。恐空復爲患。是故以空捨空。是名空空。大空者。聲聞法中。法空爲大空。如雜阿含大空經說。生因緣老死。若有人言。是老死是人老死。二俱邪見。是人老死。則衆生空。是老死是法空。摩訶衍經說。十方十方相空。是爲大空。問曰。十方空。何以名爲大空。答曰。東方無邊。故名爲大。亦一切處有。故名爲大。遍一切色。故名爲大。常有。故名爲大。益世。

間故名爲大令衆生不迷悶故名爲大如是
大方能破故名爲大空餘空破因緣生法作
法麁法易破故不名爲大是方非因緣生法
非作法微細法難破故名爲大空問曰若佛
法中無方三無爲虛空智緣盡非智緣盡亦
所不攝何以言有方亦是常是無爲法非因
緣生法非作法微細法答曰是方法聲聞論
義中無摩訶衍法中以世俗諦故有第一義
中一切法不可得何況方如五衆和合假名
衆生方亦如是四大造色和合中分別此間
彼間等假名爲方日出處是則東方日沒處
是則西方如是等是方相是方自然常有故

非因緣生亦不先無今有後無故非作法非現前知故是微細法問曰方若如是云何可破荅曰汝不聞我先說以世俗諦故有第一義故破以俗諦有故不墮斷滅中第一義破故不墮常中是名略說大空義問曰第一義空亦能破無作法無因緣法細微法何以不言大空荅曰前已得大名故不名為大今第一義名雖異義實為大出世間以涅槃為大世間以方空大以是故第一義亦是大大空復次破惡時大邪見故名為大空如行者以慈心緣東方一國土衆生復緣一國土衆生如是展轉緣時若謂盡緣東方國土則墮

邊見若謂未盡則墮無邊見生是二見故即
失慈心若以方空破是東方則滅有邊無邊
見若不以方空破東方者則墮東方心隨心
不已慈心則滅邪心則生譬如大海潮時至
其常限水則旋還魚若不還則漂在露地有
諸苦患若魚有智則隨水還永得安隱行者
如是若隨心不還則漂在邪見若隨心還不
失慈心如是不破惡時大邪見故名爲大空第
一義空者第一義名諸法實相不破不壞故
是諸法實相亦空何以故無受無著故若諸
法實相有者應受應著以無實故不受不著
若受著者即是虛誑復次諸法中第一法名

爲涅槃如阿毗曇中說云何有上法一切有
爲法及虛空非智緣盡云何無上法智緣盡
智緣盡是即涅槃涅槃中亦無涅槃相涅槃
空是第一義空問曰若涅槃空無相云何聖
人乘三種乘入涅槃又一切佛法皆爲涅槃
故說譬言如衆流皆入于海荅曰有涅槃是第
二寶無上法是有二種一有餘涅槃二無餘
涅槃愛等諸煩惱斷是名有餘涅槃聖人今
世所受五衆盡更不復受是名無餘涅槃不
得言涅槃無以衆生聞涅槃名生邪見著涅
槃音聲而作戲論若有若無以破著故說涅
槃空若人著有是著世間若著無則著涅槃

破是凡人所著涅槃不破聖人所得何以故
聖人於一切法中不取相故復次愛等諸煩
惱假名為縛若修道解是縛得解脫即名涅
槃更無有法名為涅槃如人被械得脫而作
戲論是械是脚何者是解脫是人可笑於脚
解外更求解脫衆生亦如是離五衆械更求
解脫法復次一切法不離第一義第一義不
離諸法實相能使諸法實相空名為第一義
空如是等種種名為第一義空有為空無為
空者有為法名因緣和合生所謂五衆十二
入十八界等無為法名無因緣常不生不滅
如虛空今有為法二因緣故一者無我無我

所及常相不變異不可得故空二者有爲法
有爲法相空不生不滅無所有故問曰我所
及常相不可得故應空云何言有爲法有爲
法相空答曰若無衆生法無所依又無常故
無住時無住時故不可得知是故法亦空問
曰有爲法中常相不可得不可得者爲是衆
生空爲是法空答曰有人言我心顛倒故計
我爲常是常空則入衆生空有人言以心爲
常如梵天王說是四大四大造色悉皆無常
心意識是常是常空則入法空或有人言五
衆即是常如色衆雖復變化而亦不滅餘衆
如心說五衆空即是法空是故常空亦入法

空中復次有爲法無爲法空者行者觀有爲
法無爲法實相無有作者因緣和合故有皆
是虛妄從憶想分別生不在內不在外不在
兩中間凡夫顛倒見故有智者於有爲法不
得其相知但假名以此假名導引凡夫知其
虛誑無實無生無作心無所著復次諸賢聖
人不緣有爲法而得道果以觀有爲法空故
於有爲法心不繫著故復次離有爲則無無
爲所以者何有爲法實相即是無爲無爲相
者則非有爲但爲衆生顛倒故分別說有爲
相者生滅住異無爲相者不生不滅不住不
異是爲入佛法之初門若無爲法有相者則

是有爲有爲法生相者則是集諦滅相者則是盡諦若不集則不作若不作則無滅是名無爲法如實相若得是諸法實相則不復墮生滅住異相中是時不見有爲法與無爲法合不見無爲法與有爲法合於有爲法無爲法不取相是爲無爲法所以者何若分別有爲法無爲法則於有爲無爲而有礙若斷諸憶想分別滅諸緣以無緣實智不墮生數中則得安隱常樂涅槃問曰前五空皆別說今有爲無爲空何以合說荅曰有爲無爲法相待而有若除有爲則無無爲若除無爲則無有爲是二法攝一切法行者觀有爲法無常

苦空等過知無爲法所益處廣是故二事合
說問曰有爲法因緣和合生無自性故空此
則可尔無爲法非因緣生法無破無壞常若
虛空云何空荅曰如先說若除有爲則無無
爲有爲實相即是無爲如有爲空無爲亦空
以二事不異故復次有人聞有爲法過罪而

著無爲法以著故生諸結使如阿毗曇中說
八十九有爲法緣六無爲法緣三當分別欲
界繫盡諦所斷無明使或有爲緣或無爲緣
何者有爲緣盡諦所斷有爲法緣使相應無
明使何者無爲緣盡諦所斷有爲法緣使不
相應無明使色無色界無明亦如是以此結

使故能起不善業不善業故墮三惡道是故
言無爲法空無爲緣使疑邪見無明疑者於
涅槃法中有耶無耶邪見者若生心言定無
涅槃是邪疑相應無明及獨無明合爲無明
使問曰若云無爲法空與邪見何異荅曰邪
見人不信涅槃然後生心言定無涅槃法無
爲空者破取涅槃相是爲異復次若人捨有
爲著無爲以著故無爲即成有爲以是故雖
破無爲而非邪見是名有爲無爲空畢竟空
者以有爲空無爲空破諸法無有遺餘是名
畢竟空如漏盡阿羅漢名畢竟清淨阿那含
乃至離無所有處欲不名畢竟清淨此亦如

是內空外空內外空十方空第一義空有爲
空無爲空更無有餘不空法是名畢竟空復
次若人七世百千万億無量世貴族是名畢
竟貴不以一世二世三世貴族爲真貴也畢竟
空亦如是從本已來因緣無有定實不空者
有人言今雖空最初不空如天造物始及冥
初微塵是等皆空何以故果無常因亦無常
如虛空不作果亦不作因天及微塵等亦應
如是若是常不應生無常若過去無定相未
來現在世亦如是於三世中無有一法實不
空者是名畢竟空問曰若三世都空乃至微
塵無有者則是大可畏處諸智慧人以禪定

樂故捨世間樂以涅槃樂故捨禪定樂今畢
竟空中乃至無有涅槃依止何法得捨涅槃
荅曰有著吾我人以一異相分別諸法如是
之人則以爲異如佛說凡夫人大驚怖處所
謂無我無我所復次有爲法有三世以有漏
法故生著處涅槃名一切愛著斷云何於涅
槃而求捨離復次如比丘破四重禁是名畢
竟破戒不任得道又如作五逆罪畢竟聞三
善道若取聲聞證者畢竟不得作佛畢竟空
亦如是於一切法畢竟空無復有餘問曰一
切法畢竟空是事不然何以故三世十方諸
法乃至法相法任必應有實以有一法實故

餘法爲虛妄若無一法實者亦不應有諸虛
妄法是畢竟空答曰無有乃至一法實者何
以故若有乃至一法實者是法應若有爲若
無爲若是有爲爲空中已破若是無爲無
爲空中亦破如是世間出世間若世間內空
外空內外空大空已破若出世間第一義空
已破色法無色法有漏無漏法等亦如是復
次一切法皆畢竟空是畢竟空亦空空無有
法故亦無虛實相待復次畢竟空者破一切
法令無遺餘故名畢竟空若小有遺餘不名
畢竟若言相待故應有是事不然問曰諸法
不盡空何以故因緣所生法空而因緣不空譬

如梁椽因緣和合故名舍舍空而梁椽不應
空荅曰因緣亦空因緣不定故譬如父子父
生故爲子生子故爲父復次最後因緣無依
止故如山河樹木衆生之類皆依止地地依
止水水依止風風依止虛空虛空無所依止
若本無所依止末亦無所依止以是故當知

一切法畢竟空問曰不然諸法應有根不如
神通有所變化所化雖虛而化主不空荅曰
凡夫人見所化物不久故謂之爲空化主久
故謂之爲實聖人見化主復從前世業因緣
和合生今世復集諸善法得神通力故能作
化如般若波羅蜜後品中說有三種變化煩

惱變化業變化法變化

身法法也

是故知化主亦

空問曰諸不牢固者不實故應空諸牢固物
及實法不應空如大地須弥山大海水日月
金剛等色實法牢固故不應空所以者何地
及須弥常住竟劫衆川有竭海則常滿日月
周天無有窮極又如凡人所見虛妄不真故
應空聖人所得如及法性真際涅槃相應是
實法云何言畢竟皆空復次有爲法因緣生
故不實無爲法不從因緣生故應實復云何
言畢竟空答曰堅固不堅固不定故皆空所
以者何有人以此爲堅固有人以此爲不堅
固如人以金剛爲牢固帝釋手執如人提杖

不以爲牢固又不知破金剛因緣故以爲牢固若知著龜骨上以山羊角打破則知不牢固如七尺之身以大海爲深羅睺阿修羅王立大海中膝出水上以兩手隱須彌頂下向觀忉利天喜見城此則以海水爲淺若短壽人以地爲常久牢固長壽者見地無常不牢固如佛說七日喻經佛告諸比丘一切有爲法無常變異皆歸磨滅劫欲盡時大旱積久藥草樹木皆悉焦枯有第二日出諸小流水皆悉乾竭第三日出大河流亦都涸盡第四日出閻浮提中四大河及阿那婆達多池皆亦空竭第五日出大海乾涸第六日出大

地須彌山等皆悉烟出如陶燒器第七日出
悉皆熾然無復烟氣地及須彌乃至梵天火
皆然滿尔時新生光音天者見火怖畏言既
燒梵宮將無至此先生諸天慰喻後生天言
曾已有此正燒梵宮於彼而滅不來至此燒
三千大千世界已無復灰炭佛語比丘如此
大事難信之者唯有眼見乃能信耳又比丘
過去時須涅多羅外道師離欲行四梵行無
量弟子亦得離欲須涅多羅作是念我不應
與弟子同生一處今當深修慈心此人以深
思慈故生光音天佛言須涅多羅者我身是
也我是時眼見此事以是故當知牢固實物

皆悉歸滅問曰汝說畢竟空何以說無常事
畢竟空今即是空無常今有後空荅曰無常
則是空之初門若諦了無常諸法則空以是
故聖人初以四行觀世間無常若見所著物
無常無常則能生苦苦故心生厭離若無常
空相則不可取如幻如化是名爲空外物既
空內主亦空是名無我復次畢竟是爲真空
有二種衆生一多習愛二多習見愛多者喜
生著以所著無常故生憂苦爲是人說汝所
著物無常壞故汝則爲之生苦苦若此所著物
生苦者不應生著是名說無作解脫門見多
者爲分別諸法以不知實故而著邪見爲是

人故直說諸法畢竟空復次若有所說皆是
可破可破故空所見既空見主亦空是名畢
竟空汝言聖人所得法應實者以聖人法能
滅三毒非顛倒虛誑能令衆生離老病死苦
得至涅槃是雖名實皆從因緣和合生故先
無今有今有後無故不可受不可著故亦空
非實如佛說椳喻經善法尚應捨何況不善
復次聖人有爲無漏法從有漏法緣生有漏
法虛妄不實緣所生法云何爲實離有爲法
無無爲法如先說有爲法實相即是無爲法
以是一切法畢竟不可得故名爲畢竟空無
始空者世間若衆生若法皆無有始如今生

從前出因緣有前出復從前出有如是展轉
無有衆生始法亦如是何以故若先生後死
則不從死故生生亦無死若先死後有生則
無因無緣亦不生而有死以是故一切法則
無有始如經中說佛語諸比丘衆生無有始
無明覆愛所繫往來生死始不可得破是無
始法故名爲無始空問曰無始是實不應破
何以故若衆生及法有始者即墮邊見亦墮
無因見遠離如是等過故應說衆生及法無
始今以無始空破是無始則還墮有始見答
曰今已無始空破無始見又不墮有始見譬
如救人於火不應著深水中今破是無始亦

不著有始中是則行於中道問曰云何破無
始荅曰以無窮故若無窮則無後無窮無後
則亦無中若無始則爲破一切智人所以者
何著世間無窮則不知其始不知始故則無
一切智人若有一切智人不名無始復次若
取衆生相又取諸法一相異相以此一異相
從今世推前世從前世復推前世如是展轉
衆生及法始不可得則生無始見是見虛妄
以一異爲本是故應破如有爲空破有爲法
是有爲空即復爲患復以無爲空破無爲法
今以無始破有始無始即復爲患復以無始
空破是無始是名無始空問曰若尔者佛何

以說衆生往來生死本際不可得。答曰：欲令衆生知久遠已來往來生死爲大苦。生獸患心如經說：一人在世間計一劫中受身被害時，聚集諸血多於海水，啼泣出淚及飲母乳，皆亦如是積集身骨過於毗浮羅山，譬喻斬天下草木爲二寸籌，數其父祖曾祖，猶不能盡。又如盡以地爲泥丸，數其母及曾祖母，猶亦不盡。如是等無量劫中受生死苦惱，初始不可得。故心生怖畏，斷諸結使，如無常。雖爲邊而佛以是無常而度衆生，無始亦如是。雖爲是邊亦以是無始而度衆生，爲度衆生。今生獸心故說有無始，非爲實有無始。所以者

何實有無始不應說無始空問曰若無始非
實法云何以度人答曰實法中無度人諸可
說法語言度人皆是有爲虛誑法佛以方便
力故說是無始以無著心說故受者亦得無
著無著故則生厭離復次以宿命智見衆生
生死相續無窮是時爲實若以慧眼則見衆
生及法畢竟空以是故說無始空如般若波
羅蜜中說常觀不實無常觀亦不實苦觀不
實樂觀亦不實而佛說常樂爲倒無常苦爲
諦以衆生多著常樂不著無常苦是故以無
常苦諦破是常樂倒以是故說無常苦爲諦
若衆生著無常苦者說無常苦亦空有始無

始亦如是無始能破著始倒若著無始復以
無始爲空是名無始空問曰有始法亦是邪
見應當破何以但破無始答曰有始是大惑
所以者何若有始者初身則無罪福因緣而
生善惡處若從罪福因緣而生不名爲初身
何以故若有罪福則從前身受後身故若世
間無始無如是答是故菩薩先已捨是麤惡
邪見菩薩常習用無始念衆生故說無始常
行因緣法故言法無始未得一切智故或於
無始中錯謬是故說無始空復次無始已破
有始不須空破有始今欲破無始故說無始
空問曰若無始破有始者有始亦能破無始

汝何以言但以空破無始答曰是二雖皆邪見而有差別有始起諸煩惱邪見因緣無始起慈悲及正見因緣所以者何念衆生受無始世界苦惱而生悲心知從身次第生身相續不斷便知罪福果報而生正見若人不著無始即是助道善法若取相生著即是邪見如常無常見始始見雖破無始見不能畢竟破無始能畢竟破有始是故無始爲勝如善破不善不善破善雖于相破而善能畢竟破惡如得賢聖道永不作惡惡法則不然勢力微薄故如人雖起五逆罪斷善根墮地獄久不過一劫因緣得脫地獄終成道果無始有

始優劣不同亦如是。以無始力大故能破。有始是故不說有始。空散空者散名別離相。如諸法和合故有如車以輻輳轆轤衆合爲車。若離散各在一處則失車名。五衆和合因緣故名爲人。若別離五衆人不可得。問曰若如是說但破假名而不破色。亦如離散輻輳可破車名不破輻輳散空亦如是。但離五衆可破人而不破色等。五衆答曰色等亦是假名破所以者何。和合微塵假名色故。問曰我不受微塵今以可見者爲色是實爲有。去何散而爲空。答曰若除微塵四大和合因緣生出可見色亦是假名。如四方風和合扇。冰則生沫。聚

四大和合成色亦如是若離散四大則無有
色復次是色以香味觸及四大和合故有色
可見除諸香味觸等更無別色以智分別各
各離散色不可得若色實有捨此諸法應別
有色而更無別是故經言所有色皆從四大
和合有和合有故皆是假名假名故可散問
曰色假名故可散四衆無色云何可散答曰
四陰亦是假名生老住無常觀故散而爲空
所以者何生時異老時異住時異無常時異
故復次三世中觀是四衆皆亦散滅復次心
隨所緣緣滅則滅緣破則破復次此四衆不
定隨緣生故譬如火隨所燒處爲名若離燒

處火不可得因眼緣色生眼識若離所緣識
不可得餘情識亦如是如經中說佛告羅陀
此色衆破壞散滅今無所有餘衆亦如是是
名散空復次譬如小兒聚土爲臺殿城郭閭
里宮舍或名米或名爲麵愛著守護日暮將
歸其心捨離踰壞散滅凡夫人亦如是未離
欲故於諸法中生愛著心若得離欲見諸法
皆散壞棄捨是名散空復次諸法合集故各
有名字凡夫人隨逐名字生顛倒染著佛爲
說法當觀其實莫逐名字有無皆空如迦旃
延經說觀集諦則無無見觀滅諦則無有見
如是種種因緣是名散空性空者諸法性常

空假來相續故似若不空譬如水性自冷假
火故熱止火停久水則還冷諸法性亦如是
未生時空無所有如水性常冷諸法衆緣和
合故有如水得火成熱衆緣若少若無則無
有法如火滅湯冷如經說眼空無我無我所
何以故性自尔耳鼻舌身意色乃至法等亦
復如是問曰此經說我我所空是為衆生空
不說法空去何證性空答曰此中但說性空
不說衆生空及法空性空有二種一者於十
二入中無我無我所二者十二入相自空無
我無我所是聲聞論中說摩訶衍法說十二
入我我所無故空十二入性無故空復次若

無我無我所自然得法空以人著我及我所
故佛但說無我無我所如是應當知一切法
空若我我所法尚不著何況餘法以是故衆
生空法空終歸一義是名性空復次姓名自
有不待因緣若待因緣則是作法不名為性
諸法中皆無性何以故一切有為法皆從因
緣生因緣生則是作法若不從因緣和合則
是無法如是一切諸法性不可得故名為性
空問曰畢竟空無所有則是性空今何以重
說答曰畢竟空者名為無有遺餘性空者名
為本來常介如水性冷假火故熱止火則還
冷畢竟空如虛空常不生不滅不垢不淨去

何言同復次諸法畢竟空何以故性不可得
故諸法性空何以故畢竟空故復次性空多
是菩薩所行畢竟空多是諸佛所行何以故
性空中但有因緣和合無有實性畢竟空三
世清淨有如是等差別復次一切諸法性有
二種一者揔性二者別性揔性者無常苦空
無我無生無滅無來無去無入無出等別性
者如火熱性水濕性心爲識性如人喜作諸
惡故名爲惡性好集善事故名爲善性如十
力經中說佛知世間種種性如是諸性皆空
是名性空何以故若無常性是實應失業果
報所以者何生滅過去不住故六情亦不受

塵亦無積習因緣若無積習則無誦經坐禪
等以是故知無常性不可得無常尚不可得
何況常相復次苦性亦不可得若實有是苦
則不應生染著心若人厭畏苦痛於諸樂中
亦應厭畏佛亦不應說三受苦樂不苦不樂
亦不應苦中生瞋樂中生愛不苦不樂中生
癡若一相者樂中應生瞋苦中應生愛但是
事不然如是等苦性尚不可得何況樂性虛
妄而可得復次空相亦不可得所以者何若
有空相則無罪福無罪福故亦無今世後世
復次諸法相待有所以者何若有空應當有
實若有實應當有空空性尚無何況有實復

次若無我者則無縛無解亦無從今世至後
世受罪福亦無業因緣果報如是等因緣知
無我性尚不可得何況我性復次無生無滅
性亦不實何以故若實則墮常見若一切法
常則無罪無福若有者常有無者常無若無
者不生有者不失如不生不滅性不可得何
況生滅性無來無去無入無出等諸揔性亦
如是復次諸法別性是亦不然何以故如一
火能燒造色能照二法和合故名爲火若離
是二法有火者應別有用而無別用以是故
知火是假名亦無有實若實無火法云何言
熱是火性復次熱性從衆緣生內有身根外

有色觸和合生身識覺知有熱若未和合時
則無熱性以是故知熱非火性復次若火實
有熱性云何有人入火不燒及人身中火而
不燒身空中火水不能滅以火無有定熱性
故神通力故火不能燒身業因緣五藏不熱
神龍力故水不能滅復次若熱性與火異火

則非熱若熱與火一去何言熱是火性餘性
亦如是是揔性別性無故名爲性空復次性
空者從本已來空如世間人謂虛妄不久者
是空如須彌金剛等揔及聖人所知以爲真
實不空欲斷此疑故佛說是雖堅固相續久
住皆亦性空聖人智慧雖度衆生破諸煩惱

性不可得故是亦爲空又人謂五衆十二入
十八界皆空但如法性實際是其實性佛欲
斷此疑故但分別說五衆如法性實際皆亦
是空是名性空復次有爲性三相生住滅無
爲性亦三相不生不住不滅有爲性尚空何
況有爲法無爲性尚空何況無爲法以是種
種因緣性不可得名爲性空自相空者一切
法有二種相揔相別相是二相空故名爲相
空問曰何等是揔相何等是別相答曰揔相
者如無常等別相者諸法雖皆無常而各有
別相如地有堅相火爲熱相問曰先已說性
今說相性相有何等異答曰有人言其實無

異名有差別說性則爲說相說相則爲說性
譬如說火性即是熱相說熱相即是火性有
人言性相小有差別性言其體相言可識如
釋子受持禁戒是其性剃髮割截染衣是其
相梵志自受其法是其性頂有周羅執三奇
杖是其相如火熱是其性烟是其相近爲性
遠爲相相不定從身出性則言其實如見黃
色爲金相而內是銅火燒石磨知非金性如
人恭敬供養時似是善人是爲相罵毀辱
忿然瞋恚是其性性相內外遠近初後有如
是差別是諸相皆空名爲相空如說一切有
爲法皆是無常相所以者何生滅不住故先

無今有已有還無故屬諸因緣故虛誑不真
故無常因緣生故衆合因緣起故如是等因
緣故一切有爲法是無常相能生身心惱故
名爲苦身四威儀無不苦故苦聖諦故聖人
捨不受故無時不惱故無常故如是等因緣
名爲苦相離我所故空因緣和合生故空無
常苦空無我故名爲空始終不可得故空誑
心故名爲空賢聖一切法不著故名爲空以
無相無作解脫門故名爲空諸法實相無量
無數故名爲空斷一切語言道故名爲空滅
一切心行故名爲空諸佛辟支佛阿羅漢入
而不出故名爲空如是等因緣故是名爲空

無常苦空故無我不自在故無我無主故名
爲無我諸法無不從因緣生從因緣生故無
我無相無作故無我假名字故無我身見顛
倒故無我斷我心得道故無我以是種種名
爲無我如是等名揔相別相者地堅相火熱
相冰濕相風動相眼識依處名眼相耳鼻舌
身亦如是識覺相智慧相慧智相捨爲施相
不悔不惱爲持戒相心不變異爲忍相發勤
爲精進相攝心爲禪相無所著爲智慧相能
成事爲方便相織作生滅爲世間相無織爲
涅槃相如是等諸法各有別相知是諸相皆
空是名自相空如性空中說問曰何以不但

說相空而說自相空。答曰：若說相空，不說法體空；說自相空，即法體空。復次：衆法和合，故一法生；是一法空。如是一法皆空。今和合因緣法展轉皆亦空。一切法各各自相空，以是故名爲自相空。問曰：若一切法各各自相空，去何復有所說？答曰：衆生顛倒，故以一相異相揔相別相等。而著諸法爲斷，是故而有所說。如是等因緣，名爲自相空。一切法空者，一切法名五衆十二入十八界等，是諸法皆入種種門。所謂一切法有相知相識相緣相增上相因相果相揔相別相依相問曰：去何一切法有相？答曰：一切法有好有醜，有內有外。

一切法有心生故名爲有問曰無法中云何
言有相答曰若無法不名爲法但以遮有故
名字爲無法若實有無法則名爲有是故說
一切法有相知相者苦法智苦比智能知苦
諦集法智集比智能知集諦滅法智滅比智
能知滅諦道法智道比智能知道諦及世俗
善智能知苦能知集能知滅能知道亦能知
虛空非智緣滅是名一切法相知識相者眼
識能知色耳識能知聲鼻識能知香舌識能
知味身識能知觸意識能知法能知眼能知色能
知眼識能知耳能知聲能知耳識能知鼻能
知香能知鼻識能知舌能知味能知舌識能

知身能知觸能知身識能知意能知法能知
意識是名識相緣相者眼識及眼識相應諸
法能緣色耳識及耳識相應諸法能緣聲鼻
識及鼻識相應諸法能緣香舌識及舌識相
應諸法能緣味身識及身識相應諸法能緣
觸意識及意識相應諸法能緣法能緣眼能緣色能
緣眼識能緣耳能緣聲能緣耳識能緣鼻能
緣香能緣鼻識能緣舌能緣味能緣舌識能
緣身能緣觸能緣身識能緣意能緣法能緣
意識是名緣相增上相者一切有爲法各各
增上無爲法亦於有爲法有增上是名增上
相因果相者一切法各各爲因各各爲果是

名因果相揔相別相者一切法中各各有揔
相別相如馬是揔相白是別相如人是揔相
若失一耳則是別相如是各各展轉皆有揔
別相是爲揔相別相依相者諸法各共相依
止如草木山河依止於地地依止水是一切
各各相依是名依止相如是等一法門相攝
一切法復次二法門攝一切法所謂色無色
法可見不可見法有對無對法有漏法無漏
法有爲法無爲法內法外法觀法緣法有法
無法如是等種種二法門相三四五六乃至
無量法門相攝一切法是諸法皆空如上說
問曰若皆空者何以說一切法種種名字答

曰凡夫人於空法中無明顛倒取相故生愛
等諸煩惱因煩惱故起種種業起種種業故
入種種道入種種道故受種種身受種種身
故受種種苦樂如蠶出絲無所因自從已出
而自纏裹受燒煮苦聖人清淨智慧力故分
別一切法本末皆空欲度衆生故說其著處
所謂五衆十二入十八界等汝但以無明故
而生五衆等自作自著若聖人但說空者不
能得道以無所因無所厭故問曰汝言一切
法空是事不然何以故一切法各各自相攝
故如地堅相水濕相火熱相風動相心爲識
相慧爲知相如是一切法各自住其相云何

言空。答曰：性空自相空中已破。今當更說相不定，故不應是相。如酥蜜膠臘等，皆是地相。與火合，故自捨其相，轉成濕相。金銀銅鐵與火合，故亦自捨其相，變為水相。如水得寒，成冰，轉為地相。如人醉睡，無心定，凍冰中魚，皆無心識，捨其心相，無所覺知。如慧為知，相入諸法實相，則無所覺知。自捨知相，是故諸法無有定相。復次，若謂諸法定相，是亦不然。所以者何？如未來法，相不應來。至現在，若至現在，則捨未來相。若不捨未來相，入現在者，未來則是現在。為無未來果報，若現在入過去，則捨現在相。若不捨現在相，入過去，過去則

是現在如是等過則知諸法無有定相復次
若謂有爲法定有三相生任滅無爲法亦有
三相不生不任不滅汝以未來世中非智緣
滅法是有爲法而無有爲相若汝謂以非智
緣盡是滅相是亦不然所以者何無常盡是
名滅相非以非智緣滅故名爲滅相如是等
種種無有定相若有定相而不空者是事不
然問曰應實有法不空所以者何凡夫聖人
所知名異凡夫所知是虛妄聖人所知是實
依實聖智故捨虛妄法不可依虛妄捨虛妄
答曰爲破凡夫所知故名爲聖智若無凡夫
法則無聖法如無病則無藥是故經言離凡

夫法更無聖法凡夫法性即是聖法復次聖人於諸法不取相亦不著是故聖法為真實凡夫於諸法取相亦著故以凡夫人法為虛妄聖人雖用而不取相不取相故則無定相如是不應為難於凡夫地著法分別是聖法是凡夫法若於賢聖地則無所分別為斷衆生病故言是虛是實如說佛語非虛非實非縛非解不一不異是故無所分別清淨如虛空復次若不悉空不應說不戲論為智人相亦不應說不受不著無所依止空無相無作名為真法問曰若一切法空即亦是實去何言無實答曰若一切法空假令有法已入一切

法中破若無法不應致難問曰若一切法空是實佛三藏中何以多說無常苦空無我法如經說佛告諸比丘爲汝說法名爲第一義空何等是第一義空眼生無所從來滅亦無所去但有業有業果報作者不可得耳鼻舌身意亦復如是是中若說生無所從來滅亦無所去是常法不可得故無常但有業果報而作者不可得是爲聲聞法中第一義空云何言一切法空荅曰我是一切諸煩惱根本先著五衆爲我然後著外摠爲我我所縛故而生貪恚貪恚因緣故起諸業如佛說無作者則破一切法中我若說眼無所從來滅亦

無所去則說眼無常若無常即是苦苦即是
非我我所我我所無故於一切法中心無所
著心無所著故則不生結使不生結使何用
說空以是故三藏中多說無常苦空無我不
多說一切法空復次衆生雖聞佛說無常苦
無我而戲論諸法爲是人故說諸法空若無
我亦無我所若無我無我所是即入空義問
曰佛何以說有業有果報若有業有果報是
則不空答曰佛說法有二種一者無我二者
無法爲著見神有常者故爲說無作者爲著
斷滅見者故爲說有業有業果報若人聞說
無作者轉墮斷見滅中爲說有業有業果報

此五衆能起業而不至後世此五衆因緣生
五衆受業果報相續故說受業果報如母子身
雖異而因緣相續故如母服藥見病則差如
是今世後世五衆雖異而罪福業因緣相續
故從今世五衆因緣受後世五衆果報復次
有人求諸法相著一法若有若無若常若無
常等以著法故自法生愛他法生恚而起惡
業爲是人故說諸法空諸法空則無有法所
以者何所可愛法能生結使能生結使則是
無明因緣若生無明云何是實是爲法空復
次衆生有二種一者著世間二者求出世間
求出世間有上中下上者利根大心求佛道

中者中根求辟支佛道下者鈍根求聲聞道
求佛道者說六波羅蜜及法空爲求辟支佛
者說十二因緣及獨行法爲求聲聞者說衆
生空及四真諦法聲聞畏惡生死聞衆生空
及四真諦無常苦空無我不戲論諸法如圍
中有鹿旣著毒箭一向求脫更無他念辟支
佛雖厭老病死猶能少觀甚深因緣亦能少
度衆生譬如羣在圍中雖被毒箭猶能顧戀
其子菩薩雖厭老病死能觀諸法實究盡深
入十二因緣通達法空入無量法性譬如白
香象王在獵圍中雖被箭射顧視獵者心無
所畏及將營從安步而去以是故三藏中不

多說法空或有利根梵志求諸法實相不厭
老病死著種種法相爲是故說法空所謂先
居梵志不說五衆即是實亦不說離五衆是
實復有強論梵志佛答我法中不受有無汝
何所論有無是戲論法結使生處及雜阿含
中大空經說二種空衆生空法空羅陀經中
說色衆破裂分散今無所有椶喻經中說法
尚應捨何況非法波羅延經利衆經中說智
者於一切法不受不著若受著法則生戲論
若無所依止則無所論諸得道聖人於諸法
無取無捨若無取捨能離一切諸見如是等
三藏中處處說法空是名爲一切法空不可得

空者有人言於衆界入中我法常法不可得
故名爲不可得空有人言諸因緣中求法不
可得如五指中拳不可得故名爲不可得空
有人言一切法及因緣畢竟不可得故名爲
不可得空問曰何以故名不可得空爲智力
少故不可得爲實無故不可得答曰諸法實
無故不可得非智力少也問曰若尔者與畢
竟空自相空無異今何以故更說不可得空
答曰若人聞上諸空都無所有心懷怖畏生
疑今說因緣求索不可得故爲說不可得空
斷是疑怖故佛說不可得空所以者何佛言
我從初發心乃至成佛及十方佛於諸法中

求實不可得是名不可得空問曰何事不可
得答曰一切法乃至無餘涅槃不可得故名
爲不可得空復次行者得是不可得空不得
三毒四流四縛五蓋六愛七使八邪九結十
惡諸弊惡垢縛等都不可得故名爲不可得
空問曰若尔者行是不可得空得何等法答
曰得戒定慧得四沙門果五根五無學衆六
捨法七覺分八聖道分九次第定十無學法
得如是等問曰上言一切法乃至涅槃不可
得今何以言得戒定慧乃至十無學法答曰
是法雖得皆助不可得空無受著故是名不
可得爲無爲法故名不可得聖諦故名不可

得第一義諦故名不可得聖人雖得諸功德
入無餘涅槃故不以爲得凡夫人以爲大得
如師子雖有所作不自以爲奇餘衆生見以
爲希有聖人雖有所得而不以爲得是名爲
不可得空無法空有法空無法有法空者無
法名法已滅是滅無故名無法空有法空者
諸法因緣和合生故 有法有法無故名有
法空無法有法空者取無法有法相不可得
是爲無法有法空復次觀無法有法空故名
無法有法空復次行者觀諸法生滅若有門
若無門生門生喜滅門生憂行者觀生法空
則滅喜心觀滅法空則滅憂心所以者何生

無所得滅無所失除世間貪憂故是名無法
有法空復次十八空中初三品空破一切法
後三空亦破一切法有法空破一切法生時
住時無法空破一切法滅時無法有法空生
滅一時俱破復次有人言過去未來法空是
名無法空現在及無為法空是名有法空何
以故過去法滅失變異歸無未來法因緣未
和合未生未有未起以是故名無法觀
知現在法及無為法現在是名有法是二俱
空故名為無法有法空復次有人言無為法
無生住滅是名無法有為法生住滅是名有
法如是等空名為無法有法空是為菩薩欲

住內空乃至無法有法空當學般若波羅蜜

大智度論卷第三十一

名

愈羊主反 疥搔蘇上反 鹽俗作 鹹音咸 搥字 衰

薄危上所反 梁椽緣下直反 鈍徒困反 桎梏古上音篤反 泡

沫上音拖末 暫暫正上反 袞奇逆反 旋正作 漂反 輜

胡界反 揆古文 涸音鶴 陶燒上音桃 棧音 喻音 錯謬

下苗反 輻輳上音 轅轂上音 閭里上音 躡

躡徒苔反 慼正反 於於 蜚俗作 膠臙音

交下正 犀正作 獾良輒反 捲求負反

